

**Aalisarneq pillugu Inatsisartut inatsisaata nr. 18-ip, 31. oktober 1996-imeersup  
allanngortinneqarnera pillugu Inatsisartut inatsisaattut siunnersuut**  
(Naalakkersuisunut ilaasortaq Ane Hansen, Inuit Ataqatigiit)

**pillugu**  
**Inatsisartut Aalisarnermut, Piniarnermut Nunalerinermullu Ataatsimiititaliaata**

**ISUMALIUTISSIISSUTAA**

**Siunnersuutip aappassaaneerreqarnerani saqqummiunneqartoq**

Inatsisartut Aalisarnermut, Piniarnermut Nunalerinermullu Ataatsimiititaliaat suliarinninnermini ukuninnga inuttaqarpoq:

Inatsisartunut ilaasortaq Hans Aronsen, siulittaasoq, Inuit Ataqatigiit

Inatsisartunut ilaasortaq Andreas Uldum, siulittaasup tullia, Demokraterne

Inatsisartunut ilaasortaq, Anders Olsen, Inuit Ataqatigiit

Inatsisartunut ilaasortaq, Hans Enoksen, Siumut

Inatsisartunut ilaasortaq, Siverth K. Heilmann Atassut

**1. Siunnersuutip siullermeerreqarnera**

Inatsisartuni naalakkersuisooqatigiinnit siunnersuut tapersorsorneqartoq, illuatungiliuttunilli siunnersuut itigartitsissutigineqassasoq Ataatsimiititaliap maluginiarpaa.

**2. Siunnersuutip imarisaa.**

Kalaallit aalisarnerisa annertunerpaamik piujuaannartitsinissaq tunngavigalugu ingerlanneqarnerata siuarsarneqarnissaa siunnersuummi ataatsimut isigalugu anguniarneqarpoq. Tamanna ilaatigut pissaaq aalisarnermik susassaqtut oqartussaasunut ullumikkornit paasissutissanik amerlanerusunik tunniussisarnissaannik pisussaaffilernissaannut Naalakkersuisut piginnaatinnerisigut. Tamatumunnga pissutaatinneqarpoq aalisarneq naalakkersuinikkut aaqqissuussaannerusumik ilisimasamik tunngaveqarnissaa anguniarneqarmat. Inatsisip siunertatut §-iani 2-mi allannguutit kalaallit aalisarnerisa aqunneqarnerani atuuttussamik pingaarnernik maleruagassiornissaq anguniarneqarpoq, taamaalilluni aalisarnerup aalisagaqatigiiaanut sunniutai piujuaanartitsineq trunngavigalugu inissisimasinnaassammat. Allannguummitaaq aallaaviuvoq aalisarneq akisussaassuseqartumik maleruagassaqartinneqarluni ingerlanneqartoq nunanit tamalaanit annertunerusumik isiginiarneqaleramat, taamaalilluni atuisut annertunerulersumik tamanna pillugu isumaat naapertorneqassammat. Tamatuma saniatigut MSC-mik (Marine Stewardship Council) aaqqissuussineq naapertorlugu kalaallit aalisakkanik nioqutissiaasa akuerineqarnissaat aqutissiuunniarlugu suliniarnermik inatsisissatut siunnersuut siunertaqarpoq.

Taamatut atuisut akiliuteqartarnerat pillugu aalajangersakkamik ilanngussisoqassaaq. Atuisut akiliuteqartarnerisigut anguniarneqarpoq oqartussaasut aqutsinerannut, allaffissornerannut aamma aalisarnerup nakkutigineqarneranut atatillugu inuussutissarsiortut allaffissornikkut aningaasartuutinik ilapittuuteqaqataanissaat<sup>1</sup>. Siunnersuutikkutaaq tunitsiviit qarasaasiakkut nalunaaruteqartarnissamik pisussaanerisa aallartinnissaannut pisussaaffiliinissamut Naalakkersuisut piginnaatinneqarnissaminnik ujartuipput. Inatsisissatut siunnersuutikkutaaq qarasaasiakkut logbogit atuutilernissaannut Naalakkersuisut periarfissinneqarput, tamanna aalisarnermit paasissutissat katersorneqartartut pitsaanerulernissaannik siunertaqarpoq. Inatsisissami siunnersuummi § 29-mi allannguutissatut siunnersuutit aalisarnermi nunniussisarnermi nakkutilliinermik aallartitsinnissamut Naalakkersuisut piginnaatinneqarnissaannik periarfissiipput. Nunniussinermi nakkutilliinerup siunertaraa Kalaallit Nunaata imartaani unioqquitsilluni aalisarnerit pinngitsoortinnissaat aamma pisariaqarpat qulaajarsinnaanissaat. Allannguutittaaq siunertaraa nunat tamalaat pisussaaffiisa Kalaallit Nunaata nunani tamalaani aalisarnermik suleqatigiiffinni ilaasortaanermigut akuerisimasai naapertortinnissaat, tamatumanimi Kalaallit Nunaat naalagaaffippassuit allat peqatigalugit aalisarneq killilersugaanngitsoq unioqquitsinerusorlu akiorniassallugu imminut pisussaaffilernikummat.

### 3. Siunnersuutip tusarniaassutigineqarnera

Aalisarneq pillugu inatsisip allanngortinnissaanut siunnersuummut ilaatillugu siunnersuut tamarmiusoq 2007-imi maajip 17-ianiit 2007-imi juunip 29-anut tusarniaassutigineqarpoq. Taassuma saniatigut siunnersuut iluarsisaq 2009-mi juulip 20-aniit aggustusip 17-ianut tusarniaassutigineqarluni, tassa inatsisissatut siunnersuutip imaanik ilisimasaqalernissamik pingaartumik sineriammut qanittumi aalisartut allamik aamma periarfissinneqarnissaannik Naalakkersuisut kaammattuuteqareernerisa kingorna.

Suleqatit makku tusarniaanissami aalajangersakkat taakku tiguaat; Aalisarneq pillugu Siunnersuisoqatigiit, Inuussutissarsiordermut Naalakkersuisoqarfik, Aningaasaqarnermi Aqutsisoqarfik, Nunanut allanut Pisortaqarfik, Aatsitassanut Pisortaqarfik, Ilaqutariinnut Naalakkersuisoqarfik, Peqqissutsimut Naalakkersuisoqarfik, Kultureqarnermut, Ilinniartitaanermut, Ilisimatusarnermut Ilageeqarnermullu Naalakkersuisoqarfik, Ineqarnermut Attaveqarnermullu Naalakkersuisoqarfik, Akileraartarnermut Aqutsisoqarfik, Avatangiisinut Pinngortitamullu Aqutsisoqarfik, Aalisarsinnaanermut Akuersissutinik Nakkutilliisoqarfik, Grønlands Kommando, Politimestereqarfik, Pinngortitaleriffik, Kalaallit Nunaanni Sulisitsisut Kattuffiat, KNAPK, AGF KNI-p ataaniittoq, SIK, NUSUKA, KANUKOKA, DG-Fish (EU-Kommissioni), GrønlandsBanken, Sparbank Vest, Greenland Venture, Nunatsinni Takornariaqarnermi Inuussutissarsiordermilu Siunnersuisoqatigiit, Royal Arctic Line, Nunatta Eqqartuussivia, Deloitte, A-Revision, Censor Revision, Grønlands Revisionsselskab, Rebekka Olsvig Revision, Revision & Regnskab, Top Revision og Revisionsfirmaet, Polar Seafood, Royal Greenland A/S aamma Grønlands Kommando.

<sup>1</sup> Akuersissummut ataatsimut akuersissummut akitsuut 1.500 kr.-iuppat aamma avataasiorluni aalisarnermi tonsimut akitsuut 60 kr.-iuppat. atuisut akiliutaat katillugit 12.915.000 kr.-ussapput.

Inatsisissatut siunnersuummi uani pineqartut §§ 25, 29 aamma § 14 imm. 5 inatsisissatut siunnersuutigineqartut arlaannit oqaasertalernagit makku tusarniaassutigineqartumut akissuteqarsimapput:

Aalisarneq pillugu Siunnersuisoqatigiit, Aningaasaqarnermi Aqutsisoqarfik, Aatsitassanut ikummatissanullu Pisortaqarfik, Sulisoqarnermi Aqutsisoqarfik, Ilaqutariinnermut Peqqissutsimullu Naalakkersuisoqarfik, Kultureqarnermut, Ilinniartitaanermut, Ilisimatusarnermut Ilageeqarnermullu Naalakkersuisoqarfik, Ineqarnermut Attaveqarnermullu Naalakkersuisoqarfik, Akileraartarnermut Aqutsisoqarfik, Suliffeqarnermut Inuussutissarsiutitigullu Ilinniartitaanermut Naalakkersuisoqarfik, Aalisarsinnaanermut Akuersissutinik Nakkutilliisoqarfik, Kalaallit Nunaanni Sulisitsisut Kattuffiat, Grønlands Kommando, Politimestereqarfik, Pinnngortitaleriffik, KNAPK, SIK, NUSUKA, KANU-KOKA, DG-Fish (EU-Kommissioni), GrønlandsBanken, Takornariaqarnermi Inuussutissarsiornermilu Siunnersuisoqatigiit, Nunatta Eqqartuussivia aamma Deloitte, Polar Seafood A/S kiisalu Royal Greenland A/S.

Tusarniaaffigisanit isummat assigiinneqimmata ataatsimiititaliap uissuummissutiginnigilaa, kalaallimmi aalisarnerannut atatillugu soqutigisat susassaqtullu amerlaqimmata. Taamaattumik inatsisissatut siunnersuummut tusarniaaffigisat ataasiakkaat isumaat naatsumik issuassallugit ataatsimiititaliaq pissutissaqarpoq, taamaalilluni Inatsisartunut tusarniaaffigineqartut isumaat siamaseqisut assersuutigineqarsinnaammata.

## **GA**

Atuisunut akiliuteqartitsinermit tunngatillugu GA-p maluginiarpa, Aalisarneq pillugu Ataatsimiititaliarsuup atuisunut akiliuteqartitsinerup tunngavissaata qulakkeeqqaarnissaanik kaammattuuteqarsimanera. GA-p tamanna itigartinngilaa tamannalu pillugu Namminersorlutik Oqartussat inuussutissarsiuteqartunik isumaqatiginninniarnissaa kaammattuutigalugu. GA'p isumaa malillugu inatsisissatut siunnersuummi tunngavissaq annertuallaarpoq. GAp oqaatigaa, 2006-imili aningaasatigut ingerlatsinermi suliniutinut arlalinnut ataqatigiissaarinissaq noqqaassutigineqartarsimasoq.

## **KNAPK**

*”Siullermik siunnersuutip 2007-mi tusarniaassutigineqarnerani aammalu kingullermik julip 20-niit 2009-mi tusarniutigineqarmat KNAPK-miit akissutaareersut innersuussutigalugit Inatsisartunut imaattumik erseqqissaateqassaanga:*

*KNAPK aalisakkanik qalerualinnilluunniit akuersissutinut atuisut ukiumut ataasiartumik 1.500,00 kr.-inik akiliuteqartalersinnaanernut siunnersuummut tunngaviusumik tapersersuivoq. Inuiaqatigiinni isumalluutit uumassusillit piniartunit aalisartunillu atorneqartuarsinnaanerat KNAPK-mit sakkortunerpaamik tapersersorneqartuarpoq tamannalu allannguuteqanngilaq. Nalunngilarpummi inuiaqatigiinni kikkut tamarmik killilersugaanngitsumik isumalluutinik uumassusilinnik atuisinnaanngimmata – atuisinnaasullu tassaasariaqarput inuussutissarsiummik ingerlataqartut.*

*KNAPK-miit akiliutigineqartartup ukiumut 1.500 kr.-nik inissinneqarnera isumalluutinik atuigallarsinnaanertup isigalugu akiliutitup isigaarput. Siunnersuutigineqartumilu § 14, imm. 5-tut nutaatut ikkunneqartussaq tamakkiisumik tapersersorparput.*

*Siunnersuutigineqartorlu ataatsimoortumik tunngaviusumik isummerfigissagaanni KNAPK-miit tapersersornartinneqarpoq tassuunaatigut tulaassuisut tulaassaar tamakkiisumik oqimaalutarneqartalerlutik akilernerqartalersinnaanerit aqqutissiuunneqassammat. Ilanngullugulu erseqqissaatigineqassaaq tulaassat akilinngitsoorneqartartut nalingat manna tikillugu atuisut akiliuteqartalernikkut aningaasartuutaaneruligassaannut annertunerusumik isertitaqalernikkut matussuserneqarsinnaanera periarfissatut isigigatsigu.”* Ataatsimiititaliap ulloq 16. november ataatsimiinnermini KNAPK-p allakkiaanik ulloq 13. november 2009-meersumik ilisimasaqalersinneqarpoq. Taanna isumaliutissiisummut uunga tapiliussatut ilanngunneqarpoq.

## **AP**

Kattuffik AP tusarniaanermut akissummini nalunaarutigaa, nr. 1-imi Naalackersuisut piginnaatinneqarnerat ingasappallaartoq, toqqaannartumillu akileraarusersuinerunnginnersoq misissorneqartariaqartoq. AP naapertorlugu ersarissumik takuneqarsinnaasariaqarpoq akiliutitigut suut matussuserneqarniarnersut.

## **SIK**

*”SIK-p inatsisissamut allannguutissatut siunnersuutigineqartut assut iluarisimaarpai. Neriukkatta taamaasilluni imartatta pisuussutai uumassusillit inuiaqatigiinnut naligiinnerusumik iluaqutigisinnaanngortillugit inatsimmut allannguutissatut siunnersuutit periarfissiissasut, imartammi pisuussutai inuiaqatigiit tamarmik pigimmatigit, tamarmillu naligiinnerusumik iluaqutigisariaqarmatigit.*

*Kiisalu inatsimmut aamma allannguutissamut siunnersuutigineqartut kilisaatini / aalisariutini annertunerusumik nakkutilliisinnaanerit periarfissiineri assut iluarisimaarparput, taamaasilluta neriulluta ukiuni arlaqalersuni ilumut kilisaatit / aalisariutit eqqortumik nalunaarsuinersut assortuussutigineqartuortoq assortuussutigineqartussaajunnaarlugu inatsisissamut allannguutissap inississagai.”*

## **GrønlandsBanken**

Grønlandsbanken-imit oqaaseqaat naapertorlugu isumalluutiniq allanik tassalu aalisarnermi isumalluutiniq atuinermi akiliuteqartitsisarnermut atatillugu atuisunut akiliuteqartitsisarneq isiginiarneqassasoq. Ilanngullugu Grønlandsbanken isumaqarpoq, aalisarnermik inuussutissarsiteqartunut aningaasartuutitigut nammakkiiniarnerit suulluunniit sioqqullugit aningaasartuutit nutaat aalisarnermik inuussutissarsioortunut kingunerisassai nalilersorneqaaqqaartassasut.

Ataatsimiititaliaq isumaqarpoq Naalackersuisoqarfik tusarniaanermi akissutiniq suliarinninnermini tusarniaavigineqartut saqqummiussaannik eqqortumik saqqummiussisimasoq. Tusarniaaneq naammaginaruusimasoq Ataatsimiititaliaq isumaqarpoq.

## **4. Siunnersuutip Ataatsimiititaliamit suliarineqarnera**

Siunnersuutip misissornerani teknikikkut eqqortumik ilusilersorneqarsimasoq aamma nassuiaatini nalinginnaasuni tusarniaanermi akissutit naalackersuisoqarfip allanik tusarniaanermi akissutit sammisai siunnersuutip naalackersuiniikkut nalilerneqarnissaanut Inatsisartut naammaginarutimik aalajangiinissamut tunngavissinneqarsimasut Ataatsimiititaliap

maluginiarpa. Tamatuma saniatigut siunnersuummi siunertaasut isumaqatigiiffiunngitsut aamma siunnersuutip siullermeerneqarnerani partiit tamatumunnga ersarissumik naalackersuinnikkut isummernerat Ataatsimiititaliamit maluginiarneqarpoq.

## 5. Ataatsimiititaliap inassutaa

Ataatsimiititaliami amerlanerussuteqartut Inuit Ataqatigiinneersut aamma Demokratineersut siunnersuut akuerineqassasoq inassutigaa, siunnersuullu pillugu ima oqaaseqaateqarlutik:

Amerlanerussuteqartut isumaqarput inatsisissatut siunnersuummi anguniakkat aalisarnerup aqunneqarneranut nakkutigineqarneranullu pisariaqarluinnartunut tunngasuusut, tassaallutik ilaatigut aalisarnerup pinngortitami nerisaqatigiinnermut sunniuteqarnerata akuerineqarsinnaasumiitinnissaa, aalisarnermi aningaasat kaaviiartinneqartarnerisa malinnaavigineqarnissaat, aalisarnermit tulaassisarnermik nakkutilliineq aammalu aalisarnermik atuisut nakkutilliinerup ilaanut akiliuteqartinneqartalernissaat.

Periarfissat taasat maannamut aalisarneq pillugu inatsimmi tunngavissaqartinneqarnikuunngillat, taamaattumillu aalisarnermut apeqqutini arlalissuarni paasissutissanik pisariaqarluinnartunik aallerfissaqartarneq aamma maannamut killeqartuartsimavoq.

Aalisarnerup Nunatta aningaasaqarniarneranut pingaaruteqarluinnartup siunertaq malillugu aaqqissuunneqarnerasoq qulaarneqarsinnaasimannigilaq aningaasallu kaaviiartinneqarnerat, inatsisillu ilumut malinneqarnerisut iternga tikillugu ulloq maannamut paasissutissaatigineqanngillat. Tamanna aalisarneq pillugu inatsisip allanngortinneqarneratigut iluarsiivigineqassaaq.

Allannguutit aalisarnerup ingerlanneqarneranut naalackersuisoqatigiit kissaatigisaasa ilaannut naleqqersuullu arput. Pineqartut ilai tassaapput piujuaannartitsinerup isiginiarneqarnerulernera, aamma aningaasat qanoq ingerlaarnerisa nakkutigineqarnerulernerat. Taamaalluta nuannaarutigaarput allannguutissatut siunnersuutikkut siunissami aalisarnerup avatangiisinut pinngortitamullu sunniutai naammaginarumik inissisimasariaqarnerat takuneqarsinnaalissammat. Taamatut oqaasertaliinnikkut Kalaallit Nunaanni aalisarnikkut tunisassiat piujuaannartitsinissaq tunngavigalugu aalisarneqarsinnaanerat aalajangersarneqarpoq.

Ataatsimiititaliami ikinnerussuteqartut Siumumeersut siunnersuut itigartitsissutigineqassasoq inassutigaa, siunnersuullu pillugu ima oqaaseqaateqarlutik:

Sinerissami avataasiornermilu aalisarsinnaanermut akuersissummik pissagaanni immikkut akiliuteqartarnissamik, tassalu nakkutilliinermut akiliummik taallugu, pingaartumik umiatsiararsortut eqqarsaatigalugit qanoq eqqarsartoqarnerasoq Siumumiit paaserusupparput tassami Ilaatigut siunnerfigineqarmat akuersissutinut ataasiakkaanut sinerissami aalisarnissamut 1.500,00 kruunit tikillugit akiliisitsisoqarsinnaasoq tassalu qaleralinniarnissamut, nipisanniarnissamut, saattuarniarnissamut saarullinniarnissamullu. Tassalu akuersissutinut ataasiakkaanut akiliuteqartitsinissaq ingerlanneqassappat tamanna umiatsiararsortunut ilungersunarsinnassasoq Siumumiit oqaatigissavarput, tassami orsussap akia aalisarnermilu atortussat akii eqqarsaatigalugit immikkut akiliuteqartarnissaq umiatsiararsortunut nammakkuminaassammat. taamatullu akiliuteqartitsinissaq aningaasanut inatsisissamut ikkunneqareersut oqaatigineqarpoq. Kiisalu aalisakkanut qalerualinnullu akitsuutissaq, aammalu rejerniartunut, sinerissami avataanilu

aalisartunut, tonsimut ataatsimut 60,00 kruunimut akitsuutissaq naatsorsorneqarluni siunnerfigineqarmat neriunniartami avataasiortut aalisagarniartut rejerniartullu akiliuteqartitsinissaq nammassinnaassagaat, avammullu unammillernermi artornartorsiutaassanngitsoq. Kisianniuna ernumassutigigipput, paasissutissanik tamakkiisunik uumassusilinnut tunngasunik ilisimasanik pigisaqannginnerput aporffiginagu, aamma nalunaaqqutsersuisarnissamik aalisakkanik avammut niuernermi atuutilersitsinissamik inatsimmut massakut ikkussissagutta, biologit ilisimatuullu innersuussutaat kisiisa aallavigissagutsigit qimaariarsinnaajunnaassaagut tamannaluuna ernumanartoqartikkipput.

Tassami assersuutigalugu Biolog-it kissaatigereerpaat 2010-mut saarullinniartoqassanngitsoq, uanilu inatsisissami qularnaarlugu ikkunniarneqarpoq biologit innersuussutaat malillugit aaqqiisoqartassasoq, taava taamaalippat qimaariarsinnaajunnaarluta inatsimmut pitussaagut biologit innersuussutaat malissagaanni MSC-imillu nalunaaqqutsersuinissaq aamma inatsimmut ikkuppataava saarullimmik 1. kg-milluunniit tunisassiorfinnut tunisisoqarsinnaajunnaassaaq aammalu sinerissap avataani saarullinniartoqassanngilaq. Taamatut paasinninnerput ilumoornersoq Naalakkersuisunut apeqqutigerusupparput. Naggataatigit Siumumiit oqaatigissavarput akuerisinnaannginnatsigu sinerissap qanittuani aalisartut, tassa umiatsiaararsortut mikisunillu angallatillit saarullinnik, arnarlunnik qaleralinnik saattusanillu aalisassatillutik tamatigit 1.500 kr. akileeqqaartalernissaat. Siumumiit taamatut oqaaseqarluta nalunaarutigissuarput Inatsisissamut allannguutissatut siunnersuut taamatut isikkoqartillugu akuerisinnaannginnatsigu.

**Ataatsimiitaliami ikinnerussuteqartut Atassummeersut siunnersuut**

**itigartitsissutigineqassasoq inassutigaaat, siunnersuullu pillugu ima oqaaseqaateqarlutik:**

Nunatsinni inuussutissarsiutit pingaarnersaat, aalisarnermik inuussutissarsiuteqarneq pillugu Naalakkersuisut suliliinnarlutillu nunatta karsianut aningaasanik isaatitsigasuarfissatut annertuumik isumalluutigigaaat ATASSUT-mit maluginiarparput.

Taamatuttaaq maluginiarparput taamatut aqutissiuussiniarnerminni pissutaatikkat aalisarnermik inuussutissarsiuteqartut akeqanngitsorsuarmik qaloorinnartutut namminerlu iluaqutissamik aningaasannaniartutut nalilerneqartariaqarnerarlutit.

Taamatut naqissusiineq ATASSUT-mit peqataaffiginngilarput aamma peqataaffiginaviannngilarput.

Tatigeqatigiinneq ilumoortumillu suleqatiginnikkususseq kisimi aqqutissaavoq inuussutissarsiummik ingerlataqartut pisortallu akornanni pisinnaatitaaffiit pisussaaffiillu torersumik siunissamullu isigisumik ingerlanneqassappata.

Taamaattumik ATASSUT-mit Naalakkersuisut kaammattussavagut siumoortumik inernilersuinatik aammalu aalajangersaaniarnermi inatsisitigullu allannguiniarnermi inuussutissarsiuteqartut qulaassuaannarnagit suliaq ingerlateqqullugu.

Tamanna pinngippat inuussutissarsiut siuarsarneqarani akornutaasumik kinguarsarneqartuassaaq allaallu inuussutissarsiortut ilaannut ipisitsissutaasinnaassaaq. Siunnersuut manna Inatsisartunit akuersissutigineqassappat naatsorsuutigineqarpoq 13 mio. kr.-ingajaat nunatta karsianut isertitsissutaanerulissasut, ullualuillu matuma siorna raajanut akitsuutip qaffanneqarnissaa Inatsisartunut qaqinneqarpoq tassuunalu 9 mio. kr.-it missaat nunatta karsianut isertitsissutaanerusussatut naatsorsuutigineqarluni.

ATASSUT-mit nalunngilarput aningaasat pineqartut Naalakkersuisut isumaqarfigigaaat aalisarnermik inuussutissarsiuteqartunut suunngitsut imaaliannaarluni akilersinnaagaat, uagut isitsinni aningaasarpassuupput inuussutissarsiummi nunarsuarmioqatigiit akornanni unammillerfioqisumi.

Taama oqaaseqarluni siunnersuummillu siuliani allassimasunut paasinninnerit tunngavigalugit Inatsisartut Aalisarnermut, Piniarnermut Nunalerinermullu Ataatsimiititaliaata siunnersuut Inatsisartunut aappassaaniigassanngortippaa.

, Siulittaasoq

, Siulittaasup tullia